

Balua na bhisi gba Polo pi Timoté

Eli na kalanu

Bhú balua na bhisi gba Polo pi Timoté-e, ani aha líli pi Timoté maka kilí e na kulu inde la di ngateteke ani. Engú na ngbéngbé a ko bua nakibila 'ngú. Polo aha líli pi Timoté ne nato masi bhú ani ngabula nakpokpo 'ngú gba Yesu *Kilisito ngbingbili ne nasuno *Bádha Ngali na Gandja na Didili di ne bhe na Mbia ndjindji. Pí bhobhomu-o, a ayo di me ani suno *eli gba Ebhe-e ndjindji abana likabhu ani ngazæ e di ne li okpála ngagu ani lie-o.

Polo atsia agbele 'dje Timoté pindji okpekepe da 'ngú inde i ti da nakolo li ani ka nali bhú okpekebhe na ngingi inde li tata nde lie ade (2:23) i zu la di ngua ade, a la nga'e okpála inde ngadjedje li ngbili kpadji.

Bhú ndu 'ngú bhomu-o hana-a, Polo ngayo ka Timoté me ani kpata nganda ni di ne namene ongú inde li Polo ngamene e maka *nabhuka gba Polo, ne ndja bua gba ani, ne mukunda gba ani, ne nakibila 'ngú gba ani la di ne likabhu ani ngasia bhú mbolo u ngato e li ani-o.

Ongbengbe ongú inde bhú bhuku inde-e ngæe inde:

Eli na kalanu 1:1-2

Natoko ne 'he inde a ayo me u mene e 1:3 – 2:13

Líli ne nagbele 'dje ngú nalila li e 2:14 – 4:5

Ongú inde atsia bha Polo kpi e kpi 4:6-18

Eli na soso 4:19-22

Polo yi Timoté mayi

1 ¹⁻² Timoté ndika ma na mukunda, ma aye balua inde-e pi mu ngama Polo. Ebhe abhu nani ma me ma du ne *bhulu titima gba Yesu *Kilisito ngú nakpokpo engú na mukobho na duduma. Ani apa nani me ni ahá mukobho angu-o pi ní li kpadji gba Yesu Kilisito ko. A ayo me 'Dyi ní Ebhe ne Ngamá gba ní Yesu Kilisito suno bádha bhú 'bu gba o-o pi mu, u dje ndjinga mu, amba u ha di *guo 'ngú pi mu.

Polo agie heni pi Ebhe, ani atsia ato di masi bhú Timoté

³ Ma ngagie heni pi Ebhe li 'ngú gba mu-o. Ma ngamene kulu lima pi ani maka onguo ogbi ma adu nani amemene lie-o. Ma ngamemene ne bua nakpokpo kú 'ngú ndjindji. Ma nga'o mu kala Ebhe ndu 'kpí hana. Ngbikpi ne sukpe, nedhinga ma ngayo Ebhe lie, ma nga'o mu kala ani. ⁴ Ma bhundja egbá³ nani mo oku e, gumu nau mu má gala bedhe ma bedhe, amba ma bedhe ne djali bedhe. ⁵ 'To ma 'li 'to *nabhuka na kakulu inde bhú mu-o de. 'Hi mu Enise ne bhe azu ani na øelø, Loisi abhuka ngaiza nani pi mu kalanu. Ma abhuka na paká me ngamu di-e, mu ne nabhuka angu-o.

⁶ Kaka-a, ma matá ngapa engú inde-e pi mu ne toto: kpo djua bhú angu inde li Ebhe aha e pi mu-o bhú bádha bhú 'bu gba e-e ne kalanu. Ebhe aha nani angu angu-o pi mu nedhinga ma a'o 'kpa ma pí 'ndji mu lie ko. ⁷ Padhá de, anga Bua li Ebhe aha e pi ní-e, a

³1:4 Egbá: Polo a'o nani ká Timoté bhú gudhu na Efeso, ani atsia atapa bhú ndu doto na Makedonia. Ekpi angu-o, Timoté aku nani egbá naali. Tsia bhú 1 Tim. 1:3.

ko bua na tsulú de. Engú bini, Bua ang-o ngabedhe mangbo ní ne angu, ne mukánda di ne namene 'ngú li lelele.

⁸ Kaka-a, mo odjé nümü li nakpokpo 'ngú gba Ngámá gba ní-e de. Abana ma nde lie bhú tikpá li 'ngú gba ani-e, mo odjé di nümü ka bhobhomu-o de. Engú bini, ziba mangbo nazú likabhu ne ma bhú dabilí bini ngubula *Bádha Ngali ní ngakpokpo e-o. Zú likabhu ang-o me má nde alá ne angu inde li Ebhe ahaha e ko. ⁹ Ebhe akobho ní ngae, ani atsia a'í ní me ní dá ne piga gba ni-o. Ani kobho ní ka bádha 'ngú gba ní-e de, engú bini, ani akobho ní ka bádha bhú 'bu gba e di ne ka anga ani akánda nani me a adú moko. Kala me ani bho kokpí ne doto-o, ani atima Yesu Kilisito pí ní maka ani abhunda lie, amba ní sia bádha bhú 'bu ang-o. ¹⁰ Bádha bhú 'bu bhomu-o akoto mbia inde-e bhé mbasu, anga Ngámá gba ní Yesu Kilisito ago. Ani andjia angu kuo ngae. Ani asuno pí ní bhú Bádha Ngali-e me ní asia mukobho na dáduma masia.

¹¹ Ngama-a, Ebhe abhú ma me ma dá bhulú titima, ma dá di ne bhulú nakpokpo Bádha Ngali ang-o pí okpála, amba ma suno di pí uo. ¹² Ma bhadi ngazú likabhu inde-e kabula nakpokpo Bádha Ngali ang-o. Engú bini, ma tété ne nümü ade, anga ma mbila kpála inde ma a'o 'to ma 'to e hana. Ma abhuka la bhadi na paká me ani ne angu ngú nalila kulu inde ani aha e muma-a nakolo li 'kpí ani agó lie-o. ¹³ Ongú inde mo odje me ma nde ngasuno e-e, a ko ongú na kákalú inde a ayo me má kpata e-o. Lá kpekpeke bhú nabhuka, ne bhú mukánda inde ní nde ne e bhú nakpótso líní ne Yesu Kilisito-o. ¹⁴ Lila bádha nasuno inde li Ebhe aha e pí má-o ndjindji. Lila nasuno ang-o ne angu gba *Bu Bhobua inde ngadú bhú ní-o.

¹⁵ Má mbila hana me *omabhuka bhelé na ndu doto na Adjia hana a'o ka ma a'o. Fidjele ne Elemodjene di bhú ká uo. ¹⁶ A ayo me Ngámá dje ndjinga piga gba Onesifole-o, anga ani ateteke ma bhútsibhútsi, ani dje di nümü li naama 'ngú ka ma nde lie bhú tikpá-o de. ¹⁷ Engú bini, nedhinga ani akolo lie bhú gádhú na *Loma-a , ani agilí ma ne kekele hana nakolo bha bini li nedhinga ani au ma lie-o. ¹⁸ Má mbila ndjindji me nedhinga ma adú lie bhú Efeso-o, ani ateteke ma naali. A ayo me, Ngámá gba ní-e gie bádha 'ngú pí ani li 'kpí inde ani akódho 'ngú gba okpála lie-o.

Líli pí sùdha gba Yesu Kilisito

2 ¹ Ngamú Timoté ndika ma, sia angu bhú bádha bhú 'bu inde li Yesu *Kilisito ngaha e pí ní-o. ² Ongú inde mo odje ma me ma nde ngakpokpo e kala bhiti okpála inde adú adje ma-a, suno pí okpála li okpála koko ngaziba o, inde i tí da nasusuno di pí okpála koko.

³ Kibila likabhu maka sùdha na babadha gba Yesu Kilisito. ⁴ Kpála inde bhú kulu na sùdha-a líli bhú ongú ngangá na doto inde-e de, i dá me ani kánda me ní mene engú inde anga li ngámá gba ni-o. Mene bhadi moko. ⁵ Bhundja la di me, i dá me okpála nde ngamene ngeme nagú holo-o, li kpála gú maka li líli na ngeme aziba lie de-e, ani sía makalá de. ⁶ Kpála inde ngamene kpéke kulu nalu edyí-e, asía ngaiza ezú na edyí ang-o kalanú ngae. ⁷ Bhundja píndji ongú ma ngapa e pí má inde-e ndjindji, má mene mo-o, li Ngámá gba ní-e há angu pí má ngú naké mboli ndú ongú hana.

⁸ *Bádha Ngali inde ma ngakpokpo e pí okpála-a, a me Yesu Kilisito ne ndílí gba Davidi, Ebhe azuku ani bhú ká okpála inde amu-o. Mo o'ílí 'to má li ani de. ⁹ Ma ngazú likabhu inde-e kabula Bádha Ngali ang-o. U ato belegú ma bhú tikpá mugito me ma amene siti 'ngú. Engú bini, u to *eli gba Ebhe-e bhú tikpá de, eli ang-o nganu bha bini ne kalanú. ¹⁰ Kaka-a, ma ngakibila ndú likabhu inde ma ngazú e hana ngubula nateteke okpála li Ebhe abhú o-o, amba ngauo di-e, u sia mukobho di ne *sangu inde ngadú dáduma ne dáduma ka Yesu Kilisito-o. ¹¹ Engú inde ma adjí apa e inde-e, a ko kákalú 'ngú. Engú ang-o ngae inde:

«Í dá me ní nde amu bhú dabilí bini ne Yesu-o,

ní dá bhadi bhú mukobho bhú dabilí bini ne ani.

¹² Ɔ ða me ní nde alɔ kpekepeke bhú líkabhu
 ní ngazɔ e kabula Bádha Ngali-e,
 ní ɔ́ bhadi ne aní bhú dabilí bini.
 Engú bini, ɔ ða me ní nde apa me ní mbila aní de-e,
 ngaani di-e, aní pá bhadi me ní mbila ní de.
¹³ Ɔ ða me ní nde ngamene engú inde ɔ́ nga lí aní de-e,
 ngaani-e, aní djidji lie de,
 aní améne ndɔ́ 'ngú inde aní apa me ní améne e hana.
 Padhá de, anga aní tí da namene 'ngú kpi ne bhende
 aní ngapa e de.»

Kpála na kulu inde lí Ebhe abhuka e

¹⁴ Ongú inde ma apa e pí mɔ́ bhomɔ́-o, kpokpo pí *omabhuka ngɔ́bula me u bhundja
 pépé. Gbele 'dje uo lí 'ngú inde-e ne 'lí Ebhe me u atsí píndji oeli de. Padhá de, anga tata
 tété ade, a mangbo ngasiti bua okpála inde ngadjedje-o. ¹⁵ La ngamɔ́ makpe-e, mene ne
 kpéke ngú nadɔ́ maka lí Ebhe akúnda lie-o. Ða maka kpála na kulu inde ne nɔ́mɔ́ lí kulu
 gba e ade, a akúnda napa me, kpokpo eli na kúkúɔ́-o pí okpála koko lí lelele.

¹⁶ Kpe agólɔ na padhá padhá inde ɔ́ tí ne *nabhuka de-e makpe. Padhá de, anga okpála
 inde adhika lí ngua ongú bhomɔ́-o ngayie lí kpadji gba Ebhe-e bhábhukɔ́. ¹⁷ La di-e, 'lí
 uo ngayangba bhú ká okpála maka eka inde ngazídhaka mazídhaka. Imene ne Filete
 bhú ká okpála angoo. ¹⁸ U ayie lí kpadji na kúkúɔ́ 'ngú ayie. U ngapa eu pí okpála
 me nedhinga nazuku ka okpála akodho 'kpí akodho. Kaka-a, okpála koko ayie ka uo lí
 kpadji na nabhuka ayie. ¹⁹ Engú bini, kúkúɔ́ eli gba Ebhe-e yíe bhú da e de. Eli angoo
 maka nepanda inde alɔ kpekepeke. U atsia aye balɔ́a tété me: «Ngámá mbila okpála gba e
 hana.†» U atsia aye di me: «A ayo me ndɔ́ okpála hana inde ngapa me ní ne okpála gba
 Ngámá-a, 'o namene siti 'ngú ma'lo.»

²⁰ Adɔ́dɔ́ bhú 'ngbé 'tí ne limbi osaani bhelé. U abho osaani koko lí olo, u abho okoko
 lí aladja, u agolo okoko lí ndula. A píse bha bini lí obhobhomɔ́-o de, u abho matá okoko lí
 doto. Osaani bhomɔ́-o lí okulu kpikpiki. U nga'lo obhende na babadha-a ngú okpí na
 anokomía, okoko-o, u ngamene kulu ne di ndɔ́ 'kpí hana. ²¹ A bhadi pí ní moko. Lí kpála
 'o namene ndɔ́ sisiti 'ngú inde ma ngapa 'ngú lie bhomɔ́-o hana-a, lí Ebhe 'ó aní kpi pí e.
 Aní ðú maka saani na olo, anga ngaani-e, aní bedhe ngú namene ndɔ́ obabadha kulu hana.

Líli pí bádha kpála na kulu gba Ngámá

²² Timoté, gbe limɔ́ lí osisiti 'ngú inde lí omakombise koko ngamene e magbe. Ngamɔ́
 bhú dabilí bini ne okpála bhende ngayo Ngámá ne bua o bini-e, yi gíli namene *ngbili
 'ngú, ne nadɔ́ ne nabhuka, ne mukúnda di ne *guo 'ngú sɔ́nda yi. ²³ Gbe limɔ́ lí otodɔ́
 na padhá padhá lí tata nde lie ade-e magbe. Padhá de, anga mɔ́ mbila ndjindji me ndɔ́
 'ngú bhomɔ́-o hana ngagbe tolo. ²⁴ A ayo de me kpála na kulu gba Ngámá-a ða natsi-e
 de, a ayo mangbo me aní ða ne guo 'ngú pí ndɔ́ okpála hana. Aní ða kpála inde ngasuno
 'ngú pí okpála ndjindji. Aní ða la di kpála nakibila 'ngú nedhinga lí okpála ziba engú aní
 ngapa e lie de ko. ²⁵ A ayo me, aní suno 'ngú pí okpála bhende nga'o bhayiki lí engú inde
 aní ngapa e ne bhákɔ́ bua. Padhá de, anga nedhinga koko-o, lí Ebhe há kpadji pí uo ngú
 nadji mabhundja gba o ngɔ́bula me u mbila eli na kúkúɔ́-o. ²⁶ Abhomɔ́-o, u hólɔ matá
 nabhundja 'ngú ndjindji. U tsia zé bhú ekú gba Djabúɔ́ inde aholo uo, a atsia a'lo di uo sa
 líli gba aní-o.

Engú inde akódho 'kpí lí sokpí-o

3 ¹ Mbila ndjindji me bhú onedhinga na sokpí-e, kpekepeke da 'ngú adú naali. ² Padhá
 de, anga okpála adú nambila bha engú gba o makpe, u adú akúnda tí naali, u adú

†2:19 Tsia bhú Nom. 16:5.

apa 'li o, u adú obhùlù 'ngbé 'ndji, u adú nasobho Ebhe, u dú nadje okpála inde azu o-o de. U gíe heni pí okpála inde amene bádha 'ngú pí o-o de, u mánga ehe gba Ebhe-e de. ³ U dú ne mækúnda pí okpála koko de, u djé ndjinga obi o de, u adú apa 'ngú lí okpála koko sisiti. U hólo bua o ka 'ngú de, u akúnda bha bini namene obi o sisiti, u kúnda bádha 'ngú de. ⁴ U apú obi o pí obhùlù yala gba o, bua uo adú ape má pupupu, u tsia dú na'o lio ne abhálá. U akúnda mangbo engú inde a nga lí o, u kúnda Ebhe de. ⁵ U adú namene mægúto me o ne okpála gba Ebhe, engú bini, u zíba angu gba ani-e de. Gbe límù de okpála bhómù-o magbe!

⁶ Okpála koko bhú ká okpála bhómù-o ngali bhú okuti, u tsia hólo lí ekú gba o-o olisi na padhá padhá 'ngú inde oo. Olisi ango-o abedhe ne gumù 'he ngangá, u atsia abedhe di ne sisiti 'ngú bedhe. ⁷ U ngagili ndù 'kpí hana nambíla 'ngú, engú bini, angu uo kolo lí nambíla kákùlù 'ngú-o belegù de bini. ⁸ Okpála bhómù-o ngayala nakpata kákùlù 'ngú maka Djanesi ne Djambelesi ayala nani nadje 'li *Moidje lie-o. A ko okpála lí 'ndji o asiti, u bhuka Ebhe na paká paká de. ⁹ La-a, u lúka matá ne di tsutsu de, anga ngingi 'ngú u ngamene e akóto bhú djila ndù okpála hana ngbadha, maka bhe nani i mene Djanesi ne Djambelesi-o.

Engú inde a ayo nabhundja pindji e

¹⁰ La ngamù-o, mo okpata ma ndjindji bhú nasuno gba ma-o, mo ou lele nadhákù gba ma-o, mù mbíla mabhundja gba ma-a hana, mù mbíla *nabhuka gba ma-a hana, mù mbíla 'ndjá bua gba ma-a hana, mù mbíla mækúnda gba ma-a hana, mù mbíla kpéke bua gba ma-a hana. ¹¹ Mù mbíla líkabhu ma azù e ne mbolo u ato e lí ma-a hana. Mù mbíla ndù 'ngú inde apù pí ma bhú Atiokia, ne bhú Ikoniomù di ne bhú Lisitele hana. Ma azù líkabhu na paká paká, engú bini, Ngámá agbegbe ma bhú ndù líkabhu bhómù-o hana. ¹² A ne okpála koko inde akúnda nakobho maka lí Ebhe akúnda lie, bhú makpètse gba ní ne Yesu *Kilisito-o . A na paká me u ató mbolo lí ndù uo hana. ¹³ La-a, obhùlù nazi 'gú, inde di ngapite okpála-a, anù bhú siti 'ngú ne kalanù. U ngapite okpála, lí okpála koko píte di uo.

¹⁴ Engú bini ngamù-o, lù kpekpeke bhú 'ngú inde mo okpata e, mo osia di-e ne bua mù hana ko. Mù mbíla okpála asuno pí mù-o hana. ¹⁵ Nayie bhú ndíli lí mù-o, mù mbíla *Bhuku gba Ebhe-e ndjindji. Bhuku ango-o tí da naha pí mù imbilangù inde ngato kpála bhú məkobho na dūdama ka nabhuka Yesu Kilisito-o. ¹⁶ Ndù 'ngú inde u aye e bhú Bhuku gba Ebhe-e hana ayie ka Ebhe. A ne tata ngú nasuno *ngbili 'ngú pí kpála, ngú napana pùlù 'ngú gba kpála pí e, ngú nali kpála, di ne ngú nasuno pí kpála namene 'ngú maka lí Ebhe akúnda lie-o. ¹⁷ Ebhe amene mo-o ngàbula me kpála gba ni-e dū bedhe na paká paká ngú namene ndù babadha 'ngú hana.

Kpokpo 'li Ebhe

4 ¹ Yesu *Kilisito agó galikpe mago, aní tsia ú ngámá píla doto. Aní akódho 'ngú gba okpála inde mù ne obhende amu-o. Kaka-a, ma ngaha líli inde-e pí mù kala aní ne kala Ebhe me: ² kpokpo 'li Ebhe, lù pépé kpekpeke bhú bádha nedhinga abana bhú siti nedhinga. Mbe bhú 'ndji okpála inde ngamene siti 'ngú-o, pa pí uo me u 'o namene siti 'ngú ma'o. To masi bhú okpála koko ngú namene bádha 'ngú. Suno ndù ongú bhómù-o pí uo hana lí lelele di ne 'ndjá bua. ³ Padhá de, anga ekpí akólo makolo, okpála kúnda matá nadje nasuno pindji kákùlù 'ngú de. Engú bini, u adú nakpata gumù gba o makpe, u tsia pó bhúla omùsuno na eu de o. Omùsuno ango-o adú apa pí uo ongú inde anga lí uo-o. ⁴ U aníni 'dje o lí nadje kákùlù 'ngú, u tsia kpáta ongú na padhá padhá inde lí okpála ngagbe e bhú 'ndji o-o. ⁵ Engú bini ngamù-o, dū naholo bua mù bhú ndù 'ngú hana maholo. Kibila nazù líkabhu makibila. Mene kulu nakpokpo *Bádha Ngali-e ndjindji. Ndjia kulu lí Ebhe aha e pí mù-o.

⁶ M̄ma-a, nedhinga nandala 'kpa li mukobho gba ma-a nḡbula me u bh̄le ma-a akolo masikpe. Nedhinga nabhana lima pi doto inde-e ale. ⁷ Ma aḡu b̄adha gbele, ma aḡu holo akolo al̄i soso. Ma ndala 'kpa li *nabhuka de. ⁸ Mb̄ia inde-e, Ebhe aleke makal̄a m̄ma abh̄al̄a. A ko ndata na 'ngb̄e ndua inde li Nḡamá ah̄a e m̄ma li 'kp̄i an̄i akódho 'nḡá gba okp̄ala līe-o. Ndata ango-o, a ko ndata na mukobho. Nḡamá gba ní-e, a ko Nḡamá inde ngakodho 'nḡá gba okp̄ala ngbingbili. An̄i há bha ndata ango-o m̄ma kpi ma kpi de, enḡá bini, an̄i ah̄a di pi nd̄u okp̄ala hana inde ne djal̄i li nago ka an̄i-o.

Polo apa pi Timoté me an̄i go bhaka ni

⁹ Mene ne kp̄eke me m̄u go bhaka ma má gala! ¹⁰ Padhá de, anga Demasi a'o ká ma ka ḡum̄u 'he na doto na naki inde-e a'o. An̄i atapa bh̄ú ḡudh̄u na Tesalonike. Kelesasi atapa bh̄ú ḡudh̄u na Galatia. Tito atapa bh̄ú ḡudh̄u na Dalamatia. ¹¹ Luka atigala ne ma si ngae kpi e kpi. M̄u d̄u ago-o, ha Maloko, m̄u go ne an̄i bh̄ú dabili bini, anga an̄i tí da nateteke ma li kulu ma nde ne e ko. ¹² Ma atima Tisike bh̄ú ḡudh̄u na Efeso. ¹³ Li m̄u d̄u nago-o, m̄u de go m̄ma ne koti gba ma inde ma 'o nako ká e bh̄ú ḡudh̄u na T̄ul̄asi agba Kalipusi ko. Go di m̄ma ne obhuku gba ma-o, ane la mane obhende u amene e li kó 'n̄u-o.

¹⁴ Alekidjandele, bh̄ul̄u nabho bolo-o amene ma sisiti naali. Nḡamá aḡie pi an̄i nakpata lele siti 'nḡá an̄i amene e li ma-a ngae. ¹⁵ Lila di lim̄u ka an̄i malila, anga an̄i ngaḡu nasuno gba ní-e kpekpeke.

¹⁶ Nedhinga ma akpokpo 'nḡá gba ma-a līe bh̄utsibh̄utsi na bini kala okp̄ala nakodho 'nḡá-o, kp̄ala bini teteke ma de. Nd̄u uo hana a'o ká ma. Ebhe mbu li uo tété. ¹⁷ Enḡá bini, Nḡamá ateteke ma ngae, an̄i aha angu m̄ma nḡbula me ma kpokpo eli gba ní-e ndj̄indji. Nd̄u om̄paganano hana inde ad̄u oo adje. An̄i atsia agbegbe ma sakpa kuo. ¹⁸ Nḡamá agbégbe matá ma sakpa nd̄u eḡá li okp̄ala ngaḡu ma ne e hana, an̄i tsia tó ma bh̄ú Nāu gba e na abh̄al̄a-o. A ayo me u dh̄oḡe Nḡamá d̄ud̄uma ne d̄ud̄uma! A ad̄u moko.

Oeli na soso

¹⁹ Pa pi Pilisila ne Akuila, a la di-e piga gba Onesifole me ma yi uo mayi. ²⁰ Elasīte atigala bh̄ú ḡudh̄u na Kolito. Ma a'o ká Tolofime bh̄ú ḡudh̄u na Milete, anga ad̄u li an̄i ne kuo. ²¹ Mene ne kp̄eke me m̄u go ei kala nedhinga na zini. Ebulos̄i, ne Pudene, ne Line ne uo ne Kolodia, a la di-e *ondaise ní inde ei-e hana apa me o yi m̄u mayi.

²² Nḡamá d̄u ne m̄u. A ayo me, *b̄adha bh̄ú 'bu gba Ebhe-e d̄u ne yi.